

## Молитва от злорастворений ветров и бури морския

**В**ладыко Господи Боже наш, Иже ипостасным и безначальным Твоим Словом, и животворящим, и единачестным Твоим Духом, от не сущих, во еже быти, всяческая привел еси; положивый морю предел песок, и поставивый горы и доли правилом: пядию измеривый небо, и горстию содержай землю: меры и правила, пределы и составления, и чины видимей и чувственней сей давый твари, и времен изменения, и возвраты солнечных, и растворения стихий манием Твоим содержай неизреченно, и к безстрастному же и нерушиму окормляй. Сам, Всеблагий Царю, естественное и обычное Твое человеколюбие и благодать и паки употребивый к нам, посети Твоею руку дела, и не отстави от нас милостей Твоих, и щедрот Твоих, ниже разори Завет Твой, по образу Твоему создавый неизреченно нас; Иже Единороднаго Сына Твоего избавление за ны давый, и Духа неизреченным приобщением Своего Божества преподавый, остави грехов множество, молимся, превосхождением множества щедрот Твоих. Крестом и Кровию Сына Твоего грех омывый рода нашего, возведи Твою тварь к естественному составлению, и чину, чрез естество окаянно обратившуюся, безчиния ради, чрез естество и некрасоты беззаконнаго и злаго жительства нашего: покажи нам обычную великия сея пучины тишину, и належащую бурю, и смятение воздуха разреши. Заповеждь ветром, временное и согласное дыхание дати: запрети волнению морскому, и чрез естество ветров движением, да станет дух бурный, и к тишине мятежная да преложатся: яко да Твоя дела, и чудеса, и паки видят сходящии на море в кораблех, и творящии делания в водах многих. Устрой е, Человеколюбче Владыко, Твоим неприкладным человеколюбием: Иже Единороднаго Твоего Сына и Господа нашего Иисуса Христа, благоволением Твоим, и содействием Святаго Твоего Духа, изволивый быти человека, и сплавати святым Твоим учеником и апостолом, и запретити бури ветров, и морским утишатися волнам повелевый. Сам и ныне всякий сопротивный ветр успи, и волны укроти, и бурю утоли, и воздвигни нарочитая и благоключимая времена и ветры, Правитель и Помощник везде быв рабом Твоим, наставляяй я во пристанище спасения: иже Твое точию ведающе имя, и не знающе разве Тебе Бога инаго, и к Твоей помощи выну призирающе, молитвами и молениями Препоблагословенныя Богородицы, боговидных Ангелов, и всех святых, благоволением и благодатию Единороднаго Твоего Сына, с Нимже благословен еси, и с Пресвятым, и Благим, и Животворящим Твоим Духом, ныне и присно, и во веки веков. Аминь.

## Прошения на сугубой ектении

**О** еже не в гневе прещения Своего умáлити нас, грех ради и беззаконий наших, но милости и щедроты Своя от века сущыя помянути, и помиловати нас, Господу помолимся.

**О** еже помянути Завет Свой, иже к Ною, и не растлити безгóдною мокротóю, и мрачным злораствóрным воздúхом, и темною мглою, землю и нищих людей Своих: но милостивно пощадити достояние Свое, и солнцу плодоносными лучами, мерною теплотóю возсияти на земли повелети, Господу помолимся.

**О** еже повелети облакóм престати от безгоднаго дождя, и мраком разъитися: светлости же солнечней возсияти, Господу помолимся.

**О** еже пощадити люди и скоты, и всю землю сию, и не растлити ю, безгодным дождевным лиянием, Господу помолимся.